

三怡堂叢書

圭塘小葉

十四

三
卷
分
卷
上
下
二
卷

七

圭塘小藁續集

中順大夫知江西南康府事五世孫頤續編

墓志

先太夫人歸祔志

太夫人姓高氏世家彰德祖諱木剌監衛輝路考諱榮承
事卽萬寧縣尹太夫人幼淑懿祖妣王夫人愛過其女擇
配極慎乃歸先尙書公家故饒田畜而我素貧安若習焉
事姑宋夫人以孝聞周睦姻黨舉無間言先公爲小官問
關世途實多內助同官家芬華相矜獨罄簪珥延師買書
嘗曰吾教子苟成當富彼百倍人但勵志安貧瀆貨其效

應後自見也先公好客究力營給有佳飲食必蓄以待平生不私一錢間親識有私藏者謂子女曰財出夫子私將焉用此態世多我不能爲汝曹當戒也子女雖愛教不姑息故女克敬戒子不辱其先者慈訓有素焉長子有恒治生於外太夫人總於內先公居家手不釋書迄終身無纖累一妹適集賢直學士狄文忠南北間關語及輒流涕因爲有恒娶其女尤好施予遠近姻族或養於家或資以生里巷病寡猶拯焚溺故舊有喪飲食爲廢後有聞率不敢告見人憂患汲汲督諸子營救藏獲小過必掞衣履瑣屑每躬爲之諸子止之曰彼亦人也吾以此消日爾其仁厚

慈恕蓋出誠性至於女工精敏又諸族所希見有王爲兩
臺御史封恭人湯陰縣君左司員外郎進高陽郡君兩淮
轉運使加高陽郡太夫人至順二年五月廿六日棄代于
揚州壽六十有七嗚呼天乎乃至是乎有王始官南北雖
不在側而改官加封報不間歲尊慈殊慰以爲酬昔言之
矣承乏詹事中議左司員外郎右司郎中又移左司皆在
側也侍先公終正寢襄事居鄂服除有恒忽去世季有孚
入會試而有王迫赴淮漕叔有儀棄經筵檢討獨任家事
尊意懸百口累不肯出有孚登第歸居家待次乃甚喜有
出意卽迎至揚有儀從焉有王召參議中書省事具舟將

北太夫人鍾愛幼女擇歸有日臧獲病者十人乃語有王
曰汝妹事吾寤寐有念北則迂矣且病者留之誰托挈之
舟隘暑蒸此幸屋大宜夏有儀又善事我汝當扈從上京
京師屋艱得汝先往求之別不兩月妹事畢病者復計我
至京扈從適歸事當兩濟况使來三月不亟行恐叵測時
往還諸公亦旦夕從使者貼貼相勉謂堂上起居康勝處
事明當而有王冒榮不孝遂輕信焉去才四十五日而訃
音達上京矣嗚呼天乎果至是乎昔南臺同官言親年逾
七十無兼丁溺官榮違奉養者可禁指其鄰有仕江西父
病念■子而殞者有王時同署焉孰謂一旦身當之邪呼

天不聞呼地不知知是而懲而卒懼之豈非冒榮之過邁
此大罰乎棺槨衣衾雖有儀能盡美而有壬爲子病不得
嘗藥終不得視舉尙名爲人邪古人謂勿之有悔如有壬
之悔非死不能已也有壬及事祖妣夫人獲奉考終後廿
年父兄繼矢荼毒雖極而夙夜堂上身心有屬今仰而望
之無一人在上矣追念配德寔四十五年生五子二女有
恒大理軍民總管府知事繩繩天長女適編修官趙彝將
同入京先廿五日卒病其基此平幼安貞將歸人者後廿
四日卒天禍我家何其酷也孫男二寶山燕山女四明年
五月十六日祔安陽武官原先公之墓初太夫人妣武氏

若外祖考諱清外祖妣石氏皆老吾家萬寧公無子歿南海求其柩歸俱葬江夏治命當返鄉里謹奉而襄事焉敢述先德且聲不孝之罪傳爲子孫戒焉嗚呼痛哉天地有窮而此恨無窮也

亡兄大理知事公志

公諱有恒字可久彰德湯陰人曾祖諱信祖諱毅贈亞中大夫彰德路總管輕車都尉高陽郡侯祖妣宋氏高陽郡夫人考諱熙載從事郎會福院照磨兼管句承發架閣庫贈嘉議大夫禮部尙書上輕車都尉高陽郡妣高氏封高陽郡大夫先公爲貧仕祿入甚微廉淡樂道不知治生公

幼從至鄂種學緝文通蒙古書未冠卽奮勵任家事稱貨
廢居備水陸艱苦當途薦茂材除大寧路學正擢大理路
軍民總管府知事驛符偕勅至公謂遠出不能爲榮不若
治生以爲養也由是不復留意於聲名矣先公之喪哀毀
踰禮去大祥二日卒於鄂天曆己巳二月二日也疾革曰
我才四十五數何短邪事母再一二十年不爲多也今不
得事母矣嗚呼痛哉先公年甫強仕卽得公力遂斷家事
每當赴調公輒代行山川崎嶇旅食蕭索不知也佐湖廣
省理幕再至鄂公習風土便薪米因葺居焉有壬應舉歷
官奔走無寧歲仰事之重非公不能出也先塋襄事侍太

夫人居鄂困庾之積鮭菜之微莫不有備已巳庚午之荒
一門老幼賴以無餒公氣和平而中剛斟酌世故曲折詳
盡儉於自奉而豐於親朋早夜克勤內外秩秩娶李氏先
卒一女小茶靜慧絕異繼狄氏集賢直學士文忠女無子
先公嘗令養弟有儀子寶山公既卒太夫人遂命後之初
有壬登第季有孚方學公曰汝能繼兄當作雙桂堂有孚
果登至順庚午上第有壬爲兩淮轉運使遂參議中書省
事加恩二代皆公之願惜不及見也我彰德公自穎來相
積善未享先公太夫人承以碩德乃五子二女公其長也
在親左右之日校有壬爲多古人生願爲兄之意蓋有契

焉顧奔走四方廢溫清定省萬鍾千駟果何有哉公之遂
此天厚之也然以孝友天至而不終子職使太夫人高年
反服又若天之甚薄者天可問乎使公壽考則一門老幼
可坐而無慮吾兄弟放浪四方可無內顧之憂而公之所
以成就者可勝言哉公爲子而能子齊家而家齊視食焉
忘人之事者有間矣人之生世不獨官可行志也天降酷
罰太夫人之奄逝以至順三年五月十六日祔安陽武官
原先塋公從焉懼其善之泯也忍痛輟泣而志之蓋至哀
不復文也

亡室高陽郡夫人趙氏志

亡妻趙氏諱定永平樂亭人其先在金累世擢科號進士
趙家曰克者登大定廿五年第終盧龍縣尹子震至寧間
及第蔚州軍判軍判之孫兼善倜儻不羈日本之役諸兄
爲省僚慨然從行大風舟敗冒白刃掾兄出掾憲司行省
與長官齟齬輒棄去爲景州教授而卒嘗曰吾力學爲校
職使人稱先生是不墜先業志願畢矣介直嗜酒嫉佞若
仇故所遇不合娶戴氏生夫人端靜柔懿舉族異之嘗有
象過門鄉鄰空屋蔽垣諸女郎僵走邀看夫人才十三竟
不一出時大家以詩禮名者聞之爲其子求昏先生曰吾
與世偃蹇栖獨栖三女而此女最賢且術者言當郡國封

若世雖大若子未可知也其家惠而謝之有壬未昏走西
方辟山北憲使庸齋劉公有人論鑑與先生厚一日招飲
賀曰府尊屢書爲君擇昏君之昏未易擇也今真得矣母
慊不告此實府尊意不可失而此昏尤不可失也先生亦
欣然曰吾得婿矣况庸齋媒也無有也好言遂合皇慶癸
丑五月乃歸於我每以未見舅姑爲恨南臺觀省有口而
督名復北夫人至垂泣真意有不可揜者先公太夫人入
京始得行婦禮女工復盡巧緻太夫人稱善事焉平居服
澣補弊一縑不自用時有賜給悉留以獻先公之喪夫人
力疾蒞事送厝所十里不車幾斃焉歲時祭祀寢食必廢

主饋未嘗以涓粒私其子視予妹如兄弟匿珥有需傾委
不靳與娣姒居無間言人吾耳始封恭人當進縣君皆以
讓吾祖妣宋夫人夫人素多疾天曆二年九月十七日卒
于鄂年三十有四太夫人如失愛女有壬爲服齊衰期焉
初先公既棄諸孤幼妹未有家夫人誓言當盥簪珥奉之
以養姑志以恤其無父勿使人謂兄不如父也嗚呼斯言
丁寧猶在吾耳也夫人孝慈敬勤宜享福祉而壽乃止此
耶歸凡十七年未嘗遠相離惟應舉來江南涉十月爲最
久相從歷九官山川跋涉貧乏辛苦每同焉官任雖劇俸
薄食衆夫人衣飾每不給未嘗少動於心予爲轉運使祿

人稍優而夫人不及見矣夫人生失五子一女卒後又失
一子予年將半百憂患纏繞夫人有以知我之心爲何如
哉一子燕山能讀書矣女順茶姆謹視之繼夫人趙氏子
之如已子夫人可無憾矣至順二年六月追封高陽郡夫
人又明年月日葬安陽武官原從先塋禮也爲之志
惟性于貞胡嗇以齡兮惟孝于姑乃貽以茶兮其儀可母
子弗覩兮拮据成室不同適兮佳城埋玉夢則髮鬢兮自
存耳言終不可諼兮

亡妹趙宜人志

泰定丁卯二月先公尙書府君諱熙載捐館京師既祔先

瑩太夫人高氏視諸孤居鄂是歲十二月妹宜人諱異貞
從其良人翰林國史院編修官趙彝自洪州來弔彝官京
師宜人病作不能亟歸有壬爲轉運使揚州太夫人篤於
愛母子不能離且以有壬室未有繼年高目力不洞妍媸
宜人亦謂我溷兄久願擇嫂以報至順辛未遂俱至揚俄
德卜趙門趙居金陵侍太夫人得畢其願焉未幾遭疾五
月一日卒於揚州年三十有六有壬暨弟有儀輟哀治事
棺槨之美衣衾之備傾城府官吏士民哀送儀衛之盛大
夫人見之割不可忍之愛而亦爲之稍釋焉惟許氏爲顓
著性大父彰德府君諱毅始徙湯陰淳德起家先公之孝

太夫人懿德克先賢女而我祖妣高陽郡夫人宋氏柔靜
淳淑貞節著聞宜人及事之起卧與俱故性行尤相類幼
不游戲未笄尊穉衣履皆出其手先公太夫人在撫州更
疾獨宜人與弟有孚侍勞苦備至迄平復始解帶既歸趙
太夫人如失左右手事姑安陽郡太君得懽心其客我也
念違養不失口質簪珥爲貲以寄寒暑履物不絕侍介婦
有禮視前室子說自幼及冠人不知爲異出趙族大口衆
老臧獲尤難御稱無異辭先公以宜人質美輯女教書授
之宜人爲婦爲妻爲母舉無悖也彝官七品得封宜人今
名日起官曰大宜人宜均其榮而一旦先逝天之忍乃若